

Siunnersuummut Oqaaseqaatit

Nalinginnaasumik oqaaseqaatit

1. Aallaqqaasiut

Naalakkersuisut danskillu naalakkersuisui 2013-imi suleqatigiissitamik pilersitsipput, Namminersorluni Oqartussaaneq pillugu aaqqissuussinermi tunngavigineqartut malillugit Kalaallit Nunaanni Danmarkimilu inuussutissarsiornermut tunngasuni aningaasarsiornikkut suleqatigiinnermik siuarsaataasinnaasunik Kalaallit Nunaannilu inuussutissarsiutinik ineriartortitsinnermut pitsaasumik tapertaasinnaasunik siunnersuuteqartartussamik.

Suleqatigiissitaq Inuussutissarsiornermut, Suliffeqarnermut Niuernermullu Naalakkersuisoqarfiup aamma danskit Erhvervs- og Vækstministereqarfiata peqatigiillutik aqutarisimavaat, aamma kalaallit danskillu inuussutissarsiornermik suliaqartut kattuffiisa allallu susassaartut isumaat ilanngunneqarsimapput.

Danskit kalaallillu inuussutissarsiuteqartut inuillu ilisimasallit oqaloqatigalugit ataatsimeeqatigineqarsimapput, taakku danskit kalaallillu oqartussaasuisa suleqatigiinnerisa Kalaallit Nunaanni inuussutissarsiuteqarnermik ineriartortitsinerup qanoq pitsanngorsaaffigineqarsinnaaneranut tapertaasinnaasunik siunnersuuteqarsimallutik. Taamatuttaaq danskit, kalaallit nunaannilu tamalaani inuussutissarsiuteqartut aningaasaliissuteqartarneq pillugu isumasioqatigiissineqarsimapput, tassani Kalaallit Nunaanni niuernermik tunngaveqarluni aningaasaliissuteqar-nissamut periarfissat aporfissaasinnaasullu erseqqissaassutigineqarlutik.

Suleqatigiissitat nalunaarussiaq angusanik inassuteqaatinillu arlalinnik imalik 2015-imi februarip qaammataani saqqummiuppaat.

Inassuteqaatit taakku tunngavigalugit inuussutissarsiornermut tunngatillugu inatsimmi malit-tarisassat misissorneqarnerat annertusisaq inatsisillu nutarterneqarnera aallartinneqarpoq, taakkununga ilanngullugit ingerlatseqatigiiffiit pillugit inatsit, aningaasaateqarfiit inuussu-tissarsiornermik ingerlatsisut pillugit inatsit il. il., ilaatigut UPA 2016-imut aamma UKA 2016-imut siunnersuutinik arlalinnik tunniussisoqarluni.

Inassuteqaatit ilagaat suliffeqarfinnik nalunaarsuisarneq pillugu annertusisamik suleqatigiin-nissaq, tassani kalaallit suliffeqarfiutaasa danskit oqartussaasuinut qarasaasiaq aqputigalugu digitaliusumik nalunaaruteqarsinnaalernissaat siunertarineqarluni.

Kalaallit Nunaanni Danmarkimilu pisortatut oqartussat qarasaasiatigut digitaliusumik aaqqiisutissanik atuneq aqquitalugu inuussutissarsiortut qanoq allaffissornikkut oqili-saaneqarsinnaanerannik sammisaqarput. Qarasaasiatigut digitaliusumik aaqqiissutissanik atuinissamut ingerlatseqatigiiffik ilisarnaammik/NemID-mik tunineqartariaqarpoq. Tamanna aatsaat pisinnaavoq ingerlatseqatigiiffik CVR-imi normoqarpat.

Kalaallit Nunaat CVR pillugu inatsimmut ilaatinneqanngimmat kalaallit suliffeqarfiutaat CVR-normumik tunineqarsinnaanngillat. Taamaalilluni kalaallit suliffeqarfiutaat danskit oqartussaasuisa qarasaasiatigut nalunaaruteqarsinnaanerannut ilaatinneqanngillat, naak Kalaallit Nunaata niueqatigisartagaani Danmark pingaarnersaagaluortoq.

Taamaalillutik Danmarkimi suliarisat pillugit nalunaaruteqarfissaqartillugu allatut nalunaaruteqarnissamik isumaqatigiissuteqarniarlutik Kalaallit Nunaanni suliffeqarfiit danskit oqartussaasuinut ataasiakkaanut attaveqartariaqartarput.

Kalaallit Nunaanni suliffeqarfiit CVR-imi nalunaarsuiffimmut ilaatinneqarnissamut periarfissaat, NemID-millu tunineqarnissaat Kalaallit Nunaanni Danmarkimilu suliffeqarfinnut oqartussaasunullu iluaqutaassaaq, susasaqartunullu tamanut allaffissornikkut oqilisaassalluni.

2. Siunnersuummi qulequttat pingaarnerit

Siunnersuut kalaallit suliffeqarfiutaasa CVR-imi nalunaarsuiffimmi siunissami nalunaarsorneqartalernissaannut tunngaviliissaaq.

Kalaallit Nunaanni inatsimmik tunngaveqartariaqalernermut pissutaavoq suliassaqarfiup tamatuma tiguneqarsimanera.

Taamatuttaaq CVR-imi nalunaarsuiffimmi nalunaarsuisarnermut pingaarutilinnut pissutsinut tunngatillugu Naalakkersuisut malittarisassanik aalajangersaasinnaanerannik periarfissiisunik siunnersuut tunngaviliissutinik imaqarpoq.

Peqatigitisaanik siunnersuutip nassataanik Kalaallit Nunaanni Inuussutissarsiutinik Nalunaarsuiffik matuneqassaaq, marloqiusamillu nalunaarsuisoqartannginnissaa anguniarlugu nalunaarsuinerit tamarmik CVR-imi nalunaarsuiffimmi pisassapput.

3. Pisortanut aningaasaqarnikkut allaffissornikkullu kingunerisassai

Aallartisarnermut atatillugu pisortat aningaasaqarnerannut allaffissornerannullu tamanna kinguneqassaaq. Taakkuli killeqassasut nalilerneqarpoq, taamaallaallu aallartisarnermi atuutisallutik. Tamatuma kingorna aningaasartuutit GER-ip ingerlanneqarneratulli annertutigissasut naatsorsuutigineqarpoq.

4. Inuusutissarsiorturnut aningaasaqarnikkut allaffissornikkullu kingunerisassai

Nalunaarsorneqarnermi atuisut akiliuteqartarnissaat tunngavigalugu siunnersuut inuusutissarsiorturnut aningaasaqarnerannut aallaqqaammut killilimmik kinguneqassaaq. Aallaqqaammulli aningaasartuutaasussat taakku pisortatut oqartussaasunik attaveqarnermi qarasaasiatigut digitaliusumik aaqqiissutissanik atuinermut tunngatillugu inuusutissarsiuteqartut sipaaruteqangaatsiarnerisigut matussuserneqassapput.

5. Avatangiisinut, pinngortitamut innuttaasullu peqqissusaannut kingunerisinnaasat

Siunnersuut avatangiisinut, pinngortitamut imaluunniit inuit peqqissusaannut tunngatillugu najoqqutassatigut maleruagassanik imaqaqqangilaq.

6. Innuttaasunut kingunerisassai

Siunnersuut innuttaasunut kinguneqartussatut naatsorsuutigineqaqqangilaq.

7. Kingunerisassat pingaarutillit allat

Siunnersuut allanik kinguneqassasooq naatsorsuutigineqaqqangilaq.

8. Oqartussaasut kattuffiillu il.il. tusarniaavigineqarnerat

Siunnersuut 24. maj 2016-imit 21. juni 2016-imut Namminersorlutik Oqartussat tusarniaanermi nittartagaanniippoq.

Ilanngullugu oqartussaasuni, kattuffinni il. il. makkunani siunnersuut tusarniaassutaavoq: Naalakkersuisoqarfiit tamarmik, Digitalinngortitsinermut Aqutsisoqarfik, Sulisitsisut, KNAPK, EY Grønland, BDO, Deloitte Nuuk, Grønlands Revisionskontor, Nuna-Law, Kalaallit Nunaanni Eqqartuussissuserisut, Bank Nordik, Grønlandsbanken, KANUKOKA, Qeqqata Kommunia, Qaasuitsup Kommunia, Kommune Kujalleq, Kommuneqarfik Sermersooq.

Tusarniaanermut akissutit ukunanga tiguneqarput:

Aningaasaqarnermut Naalakkersuisoqarfik, Ilaqutariinnermut, Naligiissitaanermut Isumaginninnermut Inatsisinillu Atuutsitsinermut Naalakkersuisoqarfik, Digitalinngortitsinermut Aqutsisoqarfik, Kalaallit Nunaanni Eqqartuussissuserisut, Bank Nordik, EY Grønland, Qeqqata Kommunia, Kommuneqarfik Sermersooq, Kommune Kujalleq.

Tulliuttuni tusarniaanermut akissutit tusarniaanerullu nalaani allannguutissatut siunnersuutit takkuttut suliarineqarput. Tusarniaanermut akissutit *uingasutut* nalunaarsukkat taamaallaat

pingaaruteqassutimik nalilersuineq tunngavigalugu pingaarnersiunnarlugit ilanngussornerat oqaatigineqassaaq.

Siunnersuummut oqaaseqaatissaqanngillat Ilaqutariinnermut, Naligiissitaanermut Isumagininnermut Inatsisinillu Atuutsitsinermut Naalakkersuisoqarfik, Qeqqata Kommunua, Kalaallit Nunaanni Eqqartuussissuserisut aamma Bank Nordik.

EY siunnersuummik ilalersuivoq, aammalu kalaallit suliffeqarfiutaasa Qitiusumik Suliffeqarfinnik Nalunaarsuiffimmi - Det Centrale Virksomhedsregister - nalunaarsugaalernissaat akuersaarlugu.

Digitalinngortitsinermut Aqutsisoqarfiup siunnersuut inassutigaa, kiisalu suliffeqarfinnut aamma allanut inatsisit naapertorlugit inunnut digitalimik ilisarnaammik NemID-millu pilersitsinissamut tunngavissiisoqarnissaa iluarisimaarlugu oqaatigalugu.

Taamaattumik Namminersorlutik Oqartussat, kommunit suliffeqarfiullu allaffissornermikkut sipaarutissarsisarnissaat Digitalinngortitsinermut Aqutsisoqarfiup naatsorsuutigaa.

Kommuneqarfik Sermersuup pingaarnertut siunnersuut iluarisimaarppaa, siunnersuut siunertaqarmat allaffissornermikkut nammagassanik suliffeqarfinnut namminersortunut aamma pisortanut annikillisisinissamik.

Ilanngullugu Kommuneqarfik Sermersooq imatut oqaaseqarpoq: "[...] KS-ip naatsorsuutigaa kalaallinut atuisunut naammaginartumik isaaffiliisoqarlunilu ingerlatsiviliisoqarumaartoq, tamatumunngali tunngasunik paasissutissanik amigaateqarluni."

Naatsorsuutigineqarpoq ilassusiisoqassasoq kalaallisut atuisunut quppernernik.

Najugaqarfigisatut, kiisalu kommunimi inissisimaffinni pilersitanik qanoq ililluni paasissutissanik pissarsiortoqarsinnaanera pillugu Kommuneqarfik Sermersooq paasissutissanik amigaateqarnerarluni ilanngullugu nalunaarutigaa.

CVR-imik nalunaarsuiffik naatsorsueqqissaarnernit paasissutissanik pilersuinissamik siunertaqanngilaq, taamatullu atuuffiit pilersinneqarnissaat naatsorsuutigineqanngillat. Taamaatorli postnormukku il.il. paasissutissanik pissarsiortoqarsinnaassaaq.

Kommuneqarfik Sermersooq ingerlaqqilluni oqaaseqarpoq: "[...] KS-ip tamatuma saniatigut maqaasivai paasissutissat qanoq CVR-imut ikaarsaariarneq tigussaasumik pissanersoq pillugu, neriutigalugulu Namminersorlutik Oqartussaata assersuutigalugu paasisitsiniaanermik siunnersuinermillu aallartitsiumaartut suliffeqarfinnik mikisunik piginnittunut".

Naalakkersuisut eqqumaffigaat tigussaasunik arlalinnik unammilligassaqarmat siunnersuutip

atortuulersinnissaanut atatillugu, tamatumani aamma suliffeqarfiit malittarisassanut nutaanut naleqqussarnissaat piareersarnissaallu, ilitsersorneqarnissamullu periarfissaqarnissaat.

Kommune Kujalliup oqaatigai: "[...] inatsisissatut siunnersuutip Inatsisartut inatsisissaattut siunnersuutigineqarnera ersernerluttoq. Inatsisissatut siunnersuummut nalinginnaasumik oqaaseqaatini imm. 2-mi takuneqarsinnaavoq "suliassaqarfik tiguneqarsimammat" nuna-tsinni tunngavissiisumik inatsiseqarnissaq pisariaqartoq. Tamanna kommunip imaaliillaanaq akuerisinnaanngilaa. Danmarkimi CVR-imut inatsimmi § 25-mi allassimavoq: 'Inatsit Savalimmiunut aamma Kalaallit Nunaannut atuutinngilaq, nunalli ilaanut taakkununga Savalimmiuni imaluunniit Kalaallit Nunaanni pissutsit immikkut ittutut piunasaqarfigisitaattut allaanerussutsit ilanngullugit kunngip peqqussutaatigut tamakkiisumik imaluunniit ilaannakortumik atuutsinneqarsinnaalluni.' [...] Tamanna tunngavigalugu suliassaqarfiup tiguneqarsimaneranik naatsorsuutiginnineq tunngavilersugaanngilaq."

Kunngip peqqussutaatigut CVR-imut inatsisip Kalaallit Nunaannut atuutsinnissaanut Danmarkimi CVR-imut inatsimmi § 25-p periarfissiinera eqqortuuvoq. Taamaattorli suliassaqarfimmik tiguisoqareerpoq, suliassaqarfillu Inuussutissarsiummik Ingerlataqartunik Nalunaarsuiffik pillugu Inatsisartut inatsisaat nr. 10, 29. oktober 1999-imeersukkut inatsisiliorfiulluni. Taamaattumik suliassaqarfiup Danmarkimi inatsisiliornermut uterteqqinneqarsinnaanera taamaallaat periarfissaavoq Inatsisartut aalajangissagaluarpata suliassaqarfik danskit inatsisiliorfiattut uterteqqinniarlugu, tamannalu pissusissamisuussanngilaq.

Kommune Kujalliup oqaatigai: "[...] ajornartorsiornartutut isikkoqarpoq Naalakkersuisut siunnersuummi § 1, imm. 3-mi pisinnaatinneqarmata malittarisassiorsinnaanermut pissutsini danskit CVR-imut inatsisaanni § 23 naapertorlugu danskit Erhvervs- og Selskabsstyrelse-anni oqartussaaffigisaanni, pisunilu allaffissornikkut malittarisassiornermut atatillugu pinngitsoorani danskit Erhvervs- og Selskabsstyrelse-annut isumaqatigiinniutigineqarlutillu akuersisutigineqartussaasuni. Taamatut aaqqissuussinikkut piviusoq tassaasinnaavoq danskit Erhvervs- og Selskabsstyrelse-ata Naalakkersuisut nalunaarusiaat atorunnaarsissinnaagaa, aalajangersakkallu taakkua qanoq paasineqarnissaanni tamatigut danskit oqartussaasuinit paasinninnermik isummernerit naalaagaasariaqartassallutik."

Danmarkimi aamma Kalaallit Nunaanni oqartussaasut nalunaarsuisarnermik suleqatigiittarne-
rat nutaajunngilaq. Assersuutigalugu CPR-imik nalunaarsuisarnermik suleqatigiittoqareerpoq,
tassani nalunaarsuisarneq pillugu Danmarkimi oqartussaasut nunatsinnilu oqartussaasut su-
leqatigeereerput.

CVR-imik nalunaarsuinerimi pineqartoq tassaavoq suleqatigiinneq, suliffinnut aamma pisorta-
ni aqutsisoqarfinnut sipaaruteqartitsisussaq.

Erhvervs- og Selskabsstyrelse-p nalunaarutit atorunnaarsissinnaassanngilai, imaluunniit
Naalakkersuisunut pituttuisitsisumik malittarisassanik paasinninnermik nassuiaasinnaanatik.

Tusarniaanermut akissut Akileraartarnermut Aqutsisoqarfiup suliarisaa Aningaasaqarnermut Naalakkersuisoqarfiup tunniussimavaa. Inatsisissatut siunnersuummut tunngatillugu Akileraartarnermut Aqutsisoqarfik assut iluarinnittunik oqaaseqaateqarpoq.

Akileraartarnermut Aqutsisoqarfiup ingerlaqqilluni oqaatigaa: ”ersernerluppoq kia allaffissornikkut akisussaaffiginerai suliffeqarfinnut nalunaarsuiffiup ilaa, aamma teknikkimut allaffissornermullu tunngasut GER-imiit CVR-imut ikaarsaarnermi pisussat. Akileraartarnermut Aqutsisoqarfiup naatsorsuutigalugu missiliorpaa nukinnik annertuunik atuisoqassasooq ikaarsaariarnermi, ilaatigut paasisutissiinernut malittarisassat nutaat pillugit, paasisutissat pigisat iluarsaannerannut, periaatsinik ineriartortitsinermut il.il.”.

Unammilligassat pineqartut pillugit suleqatigiissitamik aallartitsisoqarpoq Akileraartarnermut Aqutsisoqarfimmit peqataaffigineqartumik.

Allaffissornikkut suliat agguanneqartussat nalinginnaasumik inatsisini aalajangersarneqartanngillat, taakkua Naalakkersuisunit agguanneqartarmata. Nalinginnaasumik teknikkimut allaffissornermullu tunngasumik suliassartai Akileraartarnermut Aqutsisoqarfimmit suliassa-assapput, tassani ullumikkut GER isumagineqareemat. Inuussutissarsiornermut Naalakkersuisooq pingaarnertut inatsisiliornermut tunngasortaani akisussaasuusaaq.

Suliamut suleqatigiissitami nalilerneqarpoq CVR-imut ikaarsaarnermi nukinnik atuinisaaq aningaasaliissutaareersut iluanni naammassineqarsinnaassasooq, Akileraartarnermut Aqutsisoqarfimmi GER-imut allattoqarfik CVR-imut allattoqarfingortussaammat.

Akileraartarnermut Aqutsisoqarfiup inassutigaa: ”NemID-p digitalimillu ilisarnaatip atuutsilernissaanut inatsisissatut siunnersuut naammannersooq misissorneqassasooq, inatsisissatut siunnersuut aallaavigalugu tamanna imaaliallaannaq imminerminik naammattuunera erseqqivinngimmat, imaluunniit kingusinnerusukkut malitsigisaanik inatsisiliornisaaq pisariaqassanersoq.”

Naalakkersuisut tamanna eqqumaffigaat. Siunnersuut pisariaqarpoq digitaliusumik ilisarnaammik peqalernissamut. Dansk it inatsisaanni allannguisoqartariaqassaaq digitaliusumik ilisarnaammik tunniussisarnissamut atatillugu.

Akileraartarnermut Aqutsisoqarfiup oqaatigaa: ”Inuussutissarsiummik Ingerlataqartunik Nalunaarsuiffik pillugu Inatsisartut inatsisaanni nr. 10, 29. oktober 1999-imeersup paarlattanik inatsisissatut siunnersuummi § 2-mi peqatigiiffiit, kattuffiit aningaasaateqarfiillu inatsisit naapertorlugit ingerlatsiviit eqqaaneqanngillat. Akileraartarnermut Aqutsisoqarfiup naatsorsuutigaa Naalakkersuisoqarfiup taakkua nalunaarusiornermi ilanngutissagai”

Taaguut ”inatsisit naapertorlugit ingerlatsiviit” siunnersuummi § 2-miittut paasineqartarput

EU-p ingerlatseqatigiiffinnut peqqussutaanisut nalunaarsuisarneq il.il. ingerlatseqatigiiffinnik, tamatumunnga atatillugu pisinnaatitaaffilinnik, aamma Siunnersuisoqatigiit peqqussutaanni (EØF) nr. 2186/93 ulloq 22. juni 1993-meersumi EF-mi ataqatigiissaakkanik nalunaarsuiffinnik ingerlatsivinnut tunngatillugu eqqarsaatigalugit. Taaguut ”inatsisit naapertorlugit ingerlatsiviit” § 2-mi pineqartunut ilaapput ilaatigut aningaasaateqarfiit aamma peqatigiiffiit kattuffiillu ilaat.

Akilerartarnermut Aqutsisoqarfiup oqaatigaa: ”[...] Inatsisartut inatsisaata 1. juli 2017-imiit akilerartarnermut akiliisitsiniartarnermut atatillugu atortuulernissaa immikkut unammilligassartaqanngitsoq, pilersaarutaasutut januarip aallaqqaataani 2018 pinnani.”

Siunnersuutaavoq atortuulersitsinissaq 1. januar 2018 pissasoq, taamatut aaqqissuussineq piffissaliissammat siunnersuummut tunngatillugu aqqitassat assigiinngitsut piffissaqarfigineqarnissaannut.

Akilerartarnermut Aqutsisoqarfiup oqaatigaa: ” Akilerartarnermut Aqutsisoqarfiup isumaqatigaa piffissap ingerlanerani nalunaarsuineq digitaliusariaqartoq, kisiannili eqqoriarlugu unammilligassaasoq, minnerunngitsumik inuussutissarsiornikkut ingerlatsisunit minnernut, digitaliusumik aqqissuussinissaq eqqarsaatigalugu. Taamaattumik Akilerartarnermut Aqutsisoqarfiup inassutigaa sumiiffimmi kiffartuussiveqassasoq. Pissusissamisussaaq kiffartuussiviup taassuma Akilerartarnermut Aqutsisoqarfiimmiinnissaa, maannamut tamanna misilittagaqareermat aammalu nunatsinni inuussutissarsiortunut sulisitsisunullu ataveqartuulluni.”

Naatsorsuutigineqarpoq Akilerartarnermut Aqutsisoqarfiup suli maanna kiffartuussinermik aaqqissuussineq tusarniaanermut akissummi pineqartoq ingerlatiinnassagaa.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Aalajangersakkami aalajangiunneqarpoq inatsit naapertorlugu ingerlatsiviit tunisassiortu-lluunniit Qitiusumik Suliffeqarfinnik Nalunaarsuisarfimmi nalunaarsorneqarnissamut pisus-saaffeqartut.

Imm. 2-mut

Aalajangersagaq allanik suliaqartut ingerlataqartulluunniit siunnersuummi § 1, imm 1-imi taaneqanngitsut aamma §§ 2-3-mi nassuiarneqanngitsut nalunaarsorneqarnissaannut malittari-sassanik aalajangersaanissa-mut tunngaviliivoq.

Imm. 3, nr 1-imut

Kalaallit Nunaanni oqartussat CVR-mi nalunaarsuiffimmi paasissutissanik nutarterisinnaane-rat pillugu malittarisassaliornissamut aalajangersagaq tunngaviliivoq. Erhvervs- og Selskabs-styrelsemik isumaqatigiissuteqarnikkut malittarisassaliornissaq malitseqartinneqassaaq.

Imm. 3, nr. 2-mut

Kinaassutsimut uppenarsaatit normuinik pisortat ingerlatsiviiniittunik atuisarnissaq pillugu malittarisassaliornissamut aalajangersagaq tunngaviliivoq. Taamaalilluni suliffeqarfiit pisor-tatut oqartussaasunut saaffiginninnermini CVR-normumik atuisarnissaat pillugu malittari-sassaliortoqarsinnaavoq.

Imm. 3, nr. 3-mut

Ussasaarutinut illersugaasinnaaneq pillugu malittarisassaliornissamut aalajangersagaq tun-ngaviliivoq. Taamaalillutik inatsisit naapertorlugit ingerlatsiviit Qitiusumik Suliffeqarfinnik Nalunaarsuisarfik pillugu inatsisip § 19-iani allassimasutut ussasaarutinut illersugaanissamut kissaateqarnertik nalunaarutigisinnaanngussavaat.

§ 2-mut

Aalajangersagaq imarisamigut Qitiusumik Suliffeqarfinnik Nalunaarsuisarfik pillugu inatsim-mi § 3-p imaanut assinguvoq paasineqassallunilu inatsimmut nalunaarut nr. 653, 15. juni 2006-imeersoq kingusinnerusukkut allanngortinneqartoq naapertorlugu.

CVR-mi nalunaarsuisarfiup imarai inatsisilerisut inuussutissarsiummik ingerlatsisut ima-luunniit sulisitsisuusut pillugit tunngaviummik paasissutissat, tak. § 2, imm. 1, nr 1.

Ingerlatseqatigiiffinnik nalunaarsuisarnek il. il. pillugit EU-p ingerlatseqatigiiffinnut tunngatillugit aalajangersagaani tamatumalu malitsigisaanik pisinnaatitaaffiusuni aamma kisitsisigitigut paasissutissat pissarsiariniarlugit ingerlatat pillugit EF-ataatsimut nalunaarsuiffiannik pilersitsinissaq pillugu Rådip peqqussutaanni (EØF) nr. 2186/93, 22.juni 1993-imeersumi atuuttunik aalajangersagaqarpoq. Peqqussummi kingullertut taaneqartumi aalajangersarneqarpoq inatsisit naapertorlugit ingerlatsivik EU-mi naatsorsueqqissaartarfiit nakkutigineqarnissaat aamma tunisassiornermi ingerlatseriaatsip misissoqqissaarnissaa pillugit Rådip peqqussutaanut (EØF) nr. 696/93, 15. marts 1993-imeersumut ilanngussami del II, litra A, punkt 3-misut nassuiarneqassasut. Tassani aalajangerneqarpoq ingerlataq inatsisinit pineqartoq tassaa-sinnaasoq inatsisit naapertorlugit inuk, inatsit naapertorlugu ingerlasoq arlaannaannulluunniit atasuunngitsumik, inunnut ingerlatsivinnulluunniit, piginnittuusunut peqataasunulluunniit tamatumunnga, imaluunniit inuit tigussaasut, nammineerlutik aningaasarsiornermik ingerlatsisuusut.

Ingerlatseqatigiiffinnut tunngatillugu inatsiseqarnermi pisariaqarpoq peqqussummut pineqartumut atatillugu inatsisit naapertorlugit ingerlatsiviit nassuiaasersorneqarnerata annertusineqarnissaat, peqqussummut eqqaaneqartumut atatillugu, inatsisit naapertorlugit inunnut nunanit allaneersunut atatillugu, takuuk ataaniittoq.

Nunanit allaneersutut inatsisit naapertorlugit inuttut, takuuk ataaniittoq suliffeqarfimmik Kalaallit Nunaanni suliffeqarfiup immikkoortortaagut ingerlatsisinnaaneratulli, inuit tigussaasut Kalaallit Nunaanni najugaqanngitsut aalajangersimasumilluunniit najuutinngitsut inuussutissarsiortuusinnaapput imaluunniit sulisitsisuusinnaallutik aalajangersimasumik ingerlatsivillit, immikkoortortaqarfillit assigisannilluunniit ingerlatsivillit, nalunaaruteqartarnissamik nalunaarsuisussaanermilluunniit pisussaaffeqartitaasut, assersuutigalugu akitsuutitut imaluunniit akileraarutitut A-nut peerneqartunut atatillugu. Inuit tigussaasut inatsisit naapertorlugit ingerlatsivittut CVR-imi ilaasut aamma tassaassapput nunani allamiut inuit tigussaasut Kalaallit Nunaanni inuussutissarsiummik ingerlatsinertigut pillugu nalunaarsuisussaataitaasut.

Inatsisit naapertorlugit ingerlatsiviit CVR-mi siullertut tassaassapput inuit tigussaasut, namminersorlutik inuussutissarsiummik ingerlataqartut sulisitsisulluunniit.

Namminersorluni inuussutissarsiummik ingerlatsisoqarnermoq ajornartorsiutitaqanngitsumik nalinginnaasumik aalajangerneqartarpoq. Ilisarnaatigisarpaa sinneqartooruteqarnissaaq anguniarlugu nammineq aningaasaatit atorlugit aningaasarnikkut ingerlataqarnek.

Inatsisit naapertorlugit ingerlatsivinni ilaapput inatsit naapertorlugit inuit aamma suliffeqarfiit nunanit allamiut immikkoortortaat. Taaguut uani atorneqarpoq ataatsimut taaguutitut soqutigisaqatigiit ingerlatseqatigiiffiinut, kommanditselskabinut, aningaasaateqarfinnut, akitiaatileqatigiiffinnut piginneqatigiiffinnullu, aktiaateqarluni kommanditselskabinut, piginneqatigiiffinnut, suliffeqarfinnut killeqartunik akisussaaffeqartunut, peqatigiiffinnut aamma

kattuffinnut allanut nammineerlutik inatsit naapertorlugit ingerlasuusunut, tamatumani aamma assersuutigalugu ingerlatseqatigiiffinni allanit immikkut ingerlanneqartanut.

Kalaallit Nunaanni nunanit allaneersup inatsisit naapertorlugit inuup immikkoortortamik pilersitsinera kinguneqartanngilaq inatsisit naapertorlugit inummik namminersortumik nutaamik pilersitsinerigaa.

Pingajuattut inatsisit naapertorlugit inuit aamma tassaput Namminersorlutik Oqartussat taak-kulu ataanni immikkoortortat.

Sisamaattut inatsisit naapertorlugit inuupput aamma kommunit. Kommunit tamarmik CVR-mi normulernerqassapput ataatsimik. Tamatumunnga pissutaavoq kommunini ingerlatseri-aatsip assigiinngitsuunera kiisalu kommunini ataasiakkaani aqqissuussaannerup piffissap ingerlanerani allangorsinnaasarnera, taamaammat kommunip ataatsip iluani immikkoortortat imminnut sanillersuunneqarsinnaanngillat. Aamma aqqissuussaannermi allannguinermut at-tillugu kommuni ataaseq aningaasaqarnikkut inatsisilerinikkullu immikkoortortanut arlalinnut tamarmik immikkut CVR normulinnut aggulunneqarnissaa ajornartorsiutitaqassaaq.

Tallimaattut inatsisit naapertorlugit ingerlatsivinnut ilaapput kommunit suleqatigiiffii, taakku inatsisit naapertorlugit immikkoortutut namminersortutut CVR-mut ilanngunneqassapput CVR normunillu tunineqarlutik. Kommuni suleqatigiiffiit, taakkua kattuffinni namminersor-tuni aqqissuunneqarsimagaluarpataluunniit, nalinginnaasumik soqutigisaqatigiiffittut in-gerlatseqatigiiffittut, pisortatut oqartussaapput namminersortut pisortat maleruagassaannik nalinginnaasunik malinnittussanut ilaapput.

§ 3-mut

Aalajangersagaq imarisamigut Qitiusumik Suliffeqarfinnik Nalunaarsuisarfik pillugu inatsim-mi § 4-p imaanut assinguvoq inatsisillu imaatut paasineqassalluni, takuuk inatsisitigut nalu-naarut nr. 653, 15. juni 2006-imeersoq kingusinnerusukkut allanngortinneqartoq.

Nioqutissiornermik ingerlatsivittut paasineqassaaq suliffeqarfik imaluunniit suliffeqarfiup ilaa aqqissuussaassutsimigut killilik aalajangersimasumi najugaqartoq, tassa adresseqartoq aamma nioqutissat ilaannik imaluunniit kiffartuussinernik tunisassiortoq taakkunangaluun-niit pingaarnertut tunisassiortoq.

Amerlanertigut nioqutissiorfiup assigisarpaa inatsisit naapertorlugit ingerlatsivik. Inatsisit naapertorlugit ingerlatsivik nioqutissiorfinnik arlaqartunik immikkoortoqarsin-naavoq, pingaarnertut ataasiinnarmik ingerlaqataraluarluni. Tassa inatsisit naapertorlugit in-gerlatsivik adressemut allanut nioqutissanik kiffartuussinernilluunniit ataatsimik imaluunniit aalajangersimasumik suliaqarfiusumut avissaartillugit nuunneqarsimatillugit. Assersuuti-

galugu suliffeqarfusinnaavoq adressemi aalajangersimasumi tunisassiortoq allaffissornerali adressemi allami isumagineqartoq.

Nioqqutissiornermi ingerlatsiviup taamaattumik ilagaa suliaq ataaseq, inatsisit naapertorlugit ingerlatsivik sumiiffinni assigiinngitsuni najugaqarfeqarpat.

Ingerlatat najukkamit aalajangersimasumit ingerlanneqanngitsut, assersuutigalugu biilit tuni-
niaanermi atortakkat iluarsaassisartullu, kiisalu aalisariutit umiarsuillu il.il. tunisassior-
tutut namminersortutut isigineqanngillat, najukkamulli ingerlatsiffiusumut attuumassuteqartinne-
qarlutik. Ingerlatsiffiusoq inatsisit naapertorlugit immikkoortoq allaffiata najugaqarfigisin-
naavaa, soorlu Qitiusumik Suliffeqarfinni Nalunaarsuisarfimmi nalunaarsuisarnermi najugaq
ataasiusoq.

§ 4-mut

Aalajangiunneqarpoq Naalackersuisut ersarinnerusunik aalajangersagaliorsinnaasut CVR-imi
nalunaarsuiffimmut nalunaarsuinermit aammalu tassannganiit kiffartuussinernut atatillugu.
Aalajangersagaq atortinneqassaaq akitsuutinut akiliutissanullu tunngatillugu inatsisini allani
aalajangersaasoqareersimangippat, soorlu ingerlatseqatigiiffinnut inatsimmi. Akiliutissat
aalajangersarneqartut aningaasartuutininik tunngaveqassapput, Erhvervs- og Selskabsstyrelse-i
kalaallillu oqartussaasuisa nalunaarsuinermit kiffartuussinermullu aningaasartuutigisaannik.

§ 5-imut

Imm. 1-imut

Aalajangersakkakut tunngavilerneqarpoq paasissutissanik pisariaqartinneqartunik nalunaaru-
teqanngitsup imaluunniit piaaraluni mianersuaalliorujussuarluniluunniit eqqunngitsunik paa-
sissutissiisup akiliisinneqartussanngorlugu pineqaatissinneqarsinnaanera.

Imm. 2-mut

Aalajangersakkakut tunngavilerneqarpoq siunnersuut manna naapertorlugi nalunaarut atuut-
sinneqalersoq aalajangersakkanik unioqqutsinermi Kalaallit Nunaanni pinerluttuleriner-
mi inatsit malillugu akiliisitaanissaq aalajangerneqarsinnaasoq.

Imm. 3-mut

Aalajangersakkakut aalajangersarneqarpoq inatsisit naapertorlugit inuk inatsisartut
inatsisaannik matumangga aamma aalajangersakkanik inatsisartut inatsisaat manna tunnga-
vigalugu aalajangersarneqartunik unioqqutitsisoq akiliisinneqartussanngorlugit eqqartuunne-
qarsinnaasoq, takukkit Kalaallit Nunaanni pinerluttulerinermit inatsimmi malittarisassat kapi-
tali 5-imiittut.

Imm. 4-mut

Aalajangersakkap aalajangiuppaa akiliisitsissutaasoq Nunatta Karsianut tutsinneqassasoq.

§ 6-imut

Imm. 1-imut

Siunnersuutigineqarpoq Inatsisartut inatsisaat atuutilissasoq ulloq 1. januar 2018. Tassani CVR-mi nalunaarsuiffimmut ikaarsaarnissaq piffissaqarfiginiarlugu aamma isumaqatigiissutissatut pisariaqartinneqartut inissinneqarnissaat piffissaqartinniarlugu.

Imm. 2-mut

Siunnersuutip matuma atuutsinneqalenera ilutigalugu Inuussutissarsiummik Ingerlataqartunik Nalunaarsuiffik pillugu Inatsisartut inatsisaat atorunnaarsinneqassaaq. Tassunga ilanngullugit malittarisassat inatsimmi pineqartumi tunngavilerneqarsimasut.

Imm. 3-mut

Aalajangersagaq GER-ip atorunnaarsinneqarneranut atatillugu ikaarsaariarnermi teknikkikkut aalajangersagaavoq.